

Date – 20/07/2025

Time - 7:30 -7:40Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Chief Minister Pu Lalduhoma'n PM DAJGUA chu Mizoramah tha taka kalpui niin mipui tam thei ang ber a huam thei nan MLA bialah hmalakna kalpui ani a ti.
2. Mizoram chak lak luhna kawngpui NH 306 a chhiat avanga tuialhthei phurte an tlan ngam loh avangin Aizawlah petrol leh diesel a vang tan hle.
3. Environment, Forest & Climate Change Minister Pu Lalthansanga'n khawvel thang zelah nun dan danglam zel mahse pi leh pute nun dan mawi leh zirtirna chhawm nun zel a ngaih thu a sawi.
4. Parliament-a fur thutkhawm inbuatsaih nan vawiin hian Sawrkar chuan party zawng zawng thutkhawm a ko.

<><><>

PM-DAJGUA

Chief Minister Pu Lalduhoma'n PM DAJGUA chu Mizoramah tha taka kalpui niin Department hrang hrangah hmalak ani a ti a, mipui tam thei ang ber a huam thei nan MLA bialah hmalakna kalpui ani a ti bawk.

Chief Minister chuan Dharti Aaba Janjatiya Gram Utkarsh Abhiyan hnuaiiah chuan Sawrkar Department 14 a awm tih sawiin Department 14 te hnathawh hrang hrang chu Planning Department atangin khaikhawm vek a ni a ti a, hmasawna chak zawka a awm theih nan Mizoram MLA bial tinah MLA ten mipui hrih hriat kawngah tan an la tih sawiin Department hrang hrangah hmalak ani a ti bawk.

Byte : Chief Minister

DAJGUA Scheme hi hmarchhak bial mipuite hnenah sawrkar laipui atanga hamthatna hrang hrang a thlen theihna tur leh a chhawrtu mipuite hnena sawrkar atanga hamthatna an kawtkaia chhawpchuah a ni a, Mipuiten awlsam taka an hriatthiam theihna turin IEC Campaign nasa taka neih niin mipuite hnenah engtin nge hamthatna a thlen dan chhinchhiah vek a ni a, harsatna awm chu tarlan niin a chinfel dan ngaihtuah chu a tum ber a ni.

PM-DAJGUA hi Ministry 17 laiin hmarchhak bial mipui khawsak dinhmun siamthat a, chawikan an ngaihna laiah sawrkar nen thawhhona tur scheme a ni a, India ram chhunga district 549, block 2911 leh Khaw 63,843 chhunga tribal mi vaibelchhe 5.38 huamin Mizoramah pawh khaw 383-ah hman a ni.

<><><>

CKTP

Mizoram Presbyterian Kohhran thalai, KTP te chuan ruihhlo do beihpui an thlak mek a, tun thla tir atang khan zana khawlaia ruihhlo ngai awm te ngaihvenin Street Ministry an kalpui tan a, an hmalakna hian December thla thleng a awng.

Central KTP hnuaiia Ruihhlo Do Committee Secretary Pu David Lalruatfela chuan Street Ministry chu KTP Rorel Inkhawm Vawi 11-na in a rel angin CKTP Ruihhlo Do Street Ministry chu tun thla ni khat atang khan kalpui tan a nih thu Akashvani a hrilh a. Zirtawpni zan apiangin Aizawl khawpui chhungah chuan hmun 14-ah KTP Branch hrang hrang te insemdarhin Ruihhlo ngai te ngaihvena, ei tur te pein a tul angin counselling te pek thin a nih thu a sawi a. Mizoram chhunga khaw hrang hrangah pawh KTP Branch ten an remchan anga an neih thu a sawi a ni.

Byte of David Lalruatfela.....

Pu David Lalruatfela chuan Ruihhlo Do beihpui chu KTP ten kawng hrang hrangin an thlak mek thu a sawi a. Street Ministry mai bakah KTP Branch tin te anmahni huam chhunga ruihhlo avanga harsatna tawh te ngaihven tura ngen an nih thu leh hma pawh an la meka an hriat thu a sawi a. Ruihhlo that loh zia thuziak tarlanna hoarding pawh branch tin te tar turin an ngen tih sawiin Aizawl khawpui chhung branch bik chu AMC-ah a hlawmin tar phalna dil mek a nih thu leh, khawpui pawn lamah chuan nasa taka hoarding tara hma an lak tawh thu a sawi a. Ruihhlo thatlohzia inzirtirna branch tinah nei turin an in ngen thu a sawi a. Video clip tawi insiamsiak pawh buatsaih mek a nih thu a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

OIL TANKER DRIVERS PROTEST

Mizoram chak lak luhna kawngpui NH 306 a chhiat avanga tuialhthei phurte an tlan ngam loh avangin Aizawlah petrol leh diesel a vang tan hle.

Aizawl khawpui chhunga Filling station hrang hrangte'n petrol leh diesel hralh chhuah tur an nei mumal tawh lo a, nimin hian tuialhthei tlem a zawng lo thleng awmin filling station thenkhatah pek a ni a, petrol leh diesel laktuma intlar an tam hle a ni. Filling station thenkhat chuan tanker rawn thleng a awm leh zauh zauh thin avangin hralh tur chu an la nei niin DD News palai chuan thu a dawng a, filling station thenkhat bulah petrol, black a hralh chhuak an awm reng bawk.

Kawnpui Police station atanga DD News Palai thu dawn danin nizan lam khan truck tangkhang eng emaw zat chu Aizawl lam panin rawn chhuah a ni a, hetih lai hian Kawnpui leh Sairang inkarah lirthei, bungraw phur leh dahzo tawh let leh tum tangkhang an la tam hle nia thu dawn a ni bawk.

Food, Civil Supplies & Consumer Affairs department hotute chuan kawng chhiaah tuialhthei phur tangkhang an tam avangin petrol leh diesel thleng tha lo mah

se tuialhthei chu lut lo tawp a ni lo tih kan palai an hrilh a, nimin lam khan Aizawla filling station zawng zawnga tualhtheih awm dinhmun tarlangin, diesel khawl sa litre nuai 1 chuang a awm tih leh, petrol pangngai pawh lirthei nuai 1 vel a awm thu an sawi a, petrol HP pawh litre sing 8 vel khawl sa awm meka ngaih a nih thu an sawi bawk. Filling station zingah tuialhthei sing chuang la nei mekte an awm avangin mipui tan chia hluaina tur a awm rih loah an ngai bawk a ni.

<><><>

PWD MINISTER

PWD Minister Pu Vanlalhlana'n nimin khan Tuidam leh Darlak inkar kawng, hun rei tak chhe tawh chu tlawhin kawng laitute nen Aizawl District Court-ah an inkhin mek thu a sawi.

PWD Minister chuan Hachhek tlang dungin kawng nuam leh zau zawk an nei dawn emaw tih lain National Highway 44A kawng lai tu, GAYATRI Infrastructure-te chu an hnathawh a chhiat em avangin chawlh tir an ngai tih sawiin, chumi avang chuan kawng hluiah kal a la ngai tih a sawi a, tuna harsatna tihziaawm lailawkna tur atan cheng Nuai 20 PWD in a sanction tawh a, boulder nena tangkawpin PWD-in a thawm that hna an thawh chhoh dawn thu a sawi.

National Highway 44A kawng lai tute nen Aizawl District Court ah an inkhing mek tih sawiin, he kawng laih chhunzawmna tur cheng Vaibelchhe 24 chu Ministry of Road Transport & Highway emaw Mizoram PWD account-ah emaw a awm ngei theihna turin hmalak mek a nih thu a sawi a, Court thutlukna ngaihchan mek niin a fel ve leh kawng Re-Tender tura hmalak leh nghal a ni dawn tih a sawi a ni.

Minister hi PWD Department hotuten tawiaawmin, PWD Staff Lodge, Tuidam-ah khawtlang hruaitute nen an inkawm bawk a ni.

<><><>

FOREST MINISTER

Environment, Forest & Climate Change Minister Pu Lalthansanga chuan khawvel thang zelah nun dan danglam zel mahse pi leh pute nun dan mawi leh zirtirna chhawm nun zel a ngaih thu a sawi.

Nimina Khuangchera Hall, Ailawnga Young Mizo Association, Ailawng Branch Rising Day Vawi 79-na a hmanpuinaah he thu hi sawiin Minister chuan Mizoramah NGO hrang hrangten hmun pawimawh tak an luah tih a sawi a. Sorkarin ram a enkawl danah kalphung mumal tak a nei tih sawiin hetihual hian sorkarin amah ngawtin ram a enkawl theih loh thu leh NGO hrang hrangte nena thawhhona tha neih a pawimawh thu a sawi a ni.

Minister chuan Mizoram hruaitu hmasaten YMA pawimawhna hriain khawtlang enkawl chauh ni lovin ram inrelbawlinaah hmun pawimawh tak an lo pe tawh thin tih a sawi a. YMA chu Kristianna nen a inzawm tlat tih sawiin pi leh pute atanga Mizoten an inzirtir nun dan mawi vawn nun leh zirtir mai bakah, Kristian nun dan tha chawi kan thlengin mawhphurhna leh chanvo pawimawh tak a chelh reng a ni a ti.

Ailawnga Branch YMA Rising Day hi nizan atang khan hman tan a ni a, zirnaa thi tha lawmpuina, Zaipawl intihsiak leh zai intihsiak tein hun an hmang a ni.



MEETING REGD MONSOON SESSION

Thawhlejni atanga tan tur Parliament-a Monsoon Session neih tan hmain sorkar chuan vawiin hian party zawng zawng meeting a ko. Meeting neih chung hian House of Parliament pahnihte tluang taka kalpui a nih theih nan sorkar chuan political party zawng zawngte thawhthonatha an neih a ngen dawn a ni. Tun thla ni 21 atanga neih tur Monsoon Session hi August ni 21 thleng neih a ni ang. Session chung hian House pahnih thutkhawmna zawng zawng hi vawi 21 neih a ni ang.

Thuthar la khawmtute a kawmnaah Parliamentary Affairs Minister Kiren Rijju chuan Parliament-a thil pawimawh tak tak sawiho turin sorkar chu a inpeih thu a sawi. Hei bakah hian dan pawimawh tak tak, Jan Vishwas (Amendment of Provisions) Bill 2025, National Sports Governance Bill 2025 leh Merchant Shipping Bill, 2024 te chu sawiho leh pass tura lak a nih beisei a nih thu a sawi bawk.

